

Directora di Museo Arqueologico, sra. Bibi Ruiz

Aliansa sector publico-cultural y sector priva ta masha importante pa tur instancia



ORANJESTAD - Diaranson proximo lo keda inaugura oficialmente un exposicion temporario bou titulo “O Aruba, nos Baranca ta stima”. E exposicion aki ta un proyecto colaborativo entre sector publico-cultural y sector priva.

Ayera Directora di Museo Arqueologico, sra. Bibi Ruiz a declara na BON DIA Aruba cu e colaboracion aki entre museo Arqueologico y MetaCorp ta un aliansa masha importante pa tur instancia, y no solamente cultural.

E ta haya cu caminda unda cu tin metanan comun ambos sector por traha hunto pa yega na e meta ey. Sra. Ruiz a bisa cu e team di Museo Arqueologico a identifica den Renaissance Mall -caminda e exposicion lo ser exhibi- un



espacio unico caminda cu tin un publico masha diverso. E ta señala cu e publico diverso aki lo por ta sa of no di existencia di Museo Arqueologico, pero no solamente di Museo Arqueologico, sino di otro museonan, of instancia manera Parke Nacional.

E ta califica como un manera masha eficiente e trabou cu nan ta realizando pa presenta e expo aki. E ta bisa cu e intencion ta pa lanta e curiosidad, ya cu si un hende por ehempel ta cumprando algo ta paga tino riba existencia di e museo.

Nan lo lanta curiosidad di un forma masha atractivo cu hopi color, cu textonan cortico, ya cu e luga cu nan a haya no ta un espacio pa un exposicion, pero e ta un espacio unico pa alcansa, educa y entretene publico.

Sra. Ruiz a bisa cu ora cu nan a haya e idea aki, nan a acerca MetaCorp cu tabata hopi entusiasmo; y esaki a haci cu team

di Museo Arqueologico a bira masha entusiasmo tambe. “E ta un reto pa bay traha un exposicion den un espacio cu no ta un espacio pa exposicion”, asina sra. Ruiz a declara na BON DIA Aruba.

Sra. Bibi Ruiz ta agrega cu nan ta mira e oportunidad aki como un ocasion invaluable di promove Museo Arqueologico, pasobra si nan tin cu paga na un compania di marketing e ta bira algo impagabel.

“Pues nos ta hopi contento cu e parthnership di e proyecto colaborativo aki, y pesey nos ta purba di hinca no solamente nos coleccion di e parti arqueologico sino tambe historico di herencia cultural pa henter e sector cultural tin beneficio di dje”, asina directora di Museo Arqueologico a declara.

E exposicion cu lo habri su porta otro siman lo keda habri eventualmente te cu luna di november venidero na Renaissance Mall. □